




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

TESEMA 2014

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

E le Iloa Sipela e Tamaiti Y9 o Latou Igoa O le Togafiti: Ave Tamaiti i le A'oga a le Faifeau

Lauga o le Faamanuia a le Kolisi o Tuasivi

E faatalofa atu i le pa'ia ua
afifio nei, i leni aso taua mo
faaauau itulau e 2

Ua faasino e le Tamaitiiti le Tagata i le Satauro ma faamatala *silasila itulau e 12*

O le Mafuaaga o le Pese He Hideth My Soul in the Cleft of the Rock *silasila itulau e 14*

Pepa mai le Mafutaga a le
Matagaluega

Apia Sasa'e - 16-17 Iulai 2014
Feagaiga Tuai: Tusi a Isaia
Saunia e
Rev. Siaso Samoa

Faatomuaga:

O le tusi leni a le profeta o
Isaia le isi tusi iloga o le
Feagaiga Tuai. O pine o lea
faaauau itulau e 7



O a tatou fanau, o meaalofa mai le Atua. Tatou tausii lelei
iai, 'aia le sauaina; 'aia le tuufauina; faaa'oga lelei, i le a'oga a
le faifeau, i le a'oga tulagalua, i kolisi ua iai nei, ona tatou
seleseleina lea o fua lelei mo le lumana'i o aiga, nuu, ma Ekalesia.

Ia e a'oa'o mai ia te au e faia lou finagalo

I le tau faaiiuga o le tausaga
e 1891, na faigata i le alii o
Wilfred (Ulifereti) Grenfell ona
fai lana faaiuga pe alu i New-
foundland pe leai e asiasi i
faaauau itulau e 17

O le Lima Foa'i ma Fesoasoani

A o pa'o'o mataua o le timu i
lo'u faamalama i le taeao, ma
faigata ai ona ou alu i fafo, na
ou fiafia ou te faitau i mea na
ou tusia i lalo i la'u 'api, *diary*,
faaauau itulau e 11

E le Iloa Sipela e Tamaiti Y9 o Latou Igoa

O le Togafiti: Ave Tamaiti i le A'oga a le Faifeau

mai le itulau muamua

tupulaga o teine ma tama o le Kolisi i Tuasivi. O se aso taua foi mo matua o tamaiti a'oga o le Kolisi.

Susu maia lau Susuga i le Ta'ita'i o le sauniga, lau Susuga i le Taitaifono o le Komiti o A'oga a le Ekalesia, lau Susuga Palemia Tauiliili; susu mai le Faatonu Sili o A'oga a le Ekalesia, lau Susuga Vavatau Taufao. Afifio ma papa'a'ao le Afaigaluega a le Atua. Susu lau Susuga i le alii pule o le a'oga, lau Susuga Makesi Alai. Afifio maia ma tala mai 'a'ao le mamalu i matua e faalagolago tele iai le atiinaeina o lenei Kolisi. Le pa'ia i aiga ma uo a le Kolisi i Tuasivi.

O le manatu autu o la'u tautalaga: Faamaoni - Sogasoga - Tauivi - Finafinau. Faamaoni, o lona uiga, ia faamaoni tamaiti i le faiga o a latou mea aoga, faamaoni e alu i a'oga i aso uma ae 'a'ua le tia'i a'oga. Faamaoni foi faiaoga i le a'oa'oina o tamaiti ma le saunia o a latou lesona. Faamaoni foi matua i le auina o fanau i le a'oga ina ia aua ne'i misi e tamaiti a latou lesona i lea aso ma lea aso. O isi upu, sogasoga, tauivi, finafinau, o lona uiga, 'a'ua le faavaivai, faamalosi, 'a'ua le fiu gofie, 'a'ua le paie.

O le aso lava lenei e sami ai galuega o le tausaga. O le aso e silafia ai, poo ai tamaiti sa faamaoni i le faiga o a latou mea aoga, sogasoga, finafinau ma tauivi. Ma tamaiti e le'i faamaoni, e le faalogo, e le

su'esu'e, e le faia le *home work*, e tia'i a'oga soo.

O le aso foi e silafia ai, pe na faamaoni faiaoga i le faiga o a latou galuega, pe leai.

O le aso foi e silafia ai, pe na malosi le lagolago a matua i le fa'aa'ogaina o a latou fanau, i le faiga o a latou mea a'oga, i le faaavanoa o taimi i le aiga mo le faiga o a latou mea a'oga, ma fesoasoani i ai, ma tuli mai tamaiti i a'oga ae aua le tuufauina.

O le aso la lenei o le seleselega, o galuega a faiaoga, o galuega a matua, ma galuega a le fanau sa fai. Ne'i o tatou tu'ua'i a tatou fanau i le le lelei o o latou tulaga, ma leai ni o latou faailoga, ma tatou faapea o le le sogasoga, ae galo ia oe, ma galo ia a'u, e le taumate, o ta'ua lava, e mafua ai. Ta'ua o faiaoga, ma ta'ua o matua.

A faamaoni uma vaega ia e tolu i le faataunuaina o a latou galuega, ona le 'asa lea o tatou ma manuia. A tatou le faamaoni, ona le lelei lea a'oga a tamaiti, ma maumau ai tupe o taulaga a le Ekalesia, lea e faatupe ai mea ia.

Faamalo ia outou ua maua faailoga, ma lelei o outou tulaga ia outou vasega. Ae ou te faamalo atu foi ia outou e le o sili pe tulua pe tutolu, ae sa outou faamaoni i le faiga o a outou meaaoga, ma to'a'aga mai i le a'oga. E silafia lelei e le Atua taleni ma tomai o ia te oe: le taleni e tasi, taleni e lua, ma taleni e lima, ma ia faamanuia mai e tusa ona e

faaaogaina au taleni.

A o le lipoti a le Faatonu Sili o A'oga a le tatou Ekalesia na tau'a'aoina i le fono a le Komiti o A'oga i le amataga o le tausaga nei, na mautinoa ai, le le faamaoni o nisi o faiaoga, i nisi o a'oga a le Ekalesia. Na avatu i le fono igoa o i latou ia na maua i asiasiga e matua leaga lava. E le lelei, e le feoololo, ae matua leaga lava. Na ou te'i ai lava a'u i lo'u vaai atu i nisi o igoa na avatu ai. E tia'i a'oga; le saunia a latou lesona; faiaoga ma le le usita'i i le pule a'oga. Ae alu tupe o taulaga a le Ekalesia e totogi ai i latou ia. Latou te le lagona le taumafai o tagata lotu o le Ekalesia e lafo tupe ia latou taulaga, lea e totogi ai mea ia. E totogi ai latou ia, ae le faamaoni. Ne'i manatu faiaoga e le o iloa mai i le Ofisa Tutotonu o le Ekalesia i Apia, au tou galuega o fai. Tou te galulue i tua nei, ae iloa mai i Apia e le Ofisa Tutotonu o le Ekalesia.

Ua maua foi i se faaaliga mai le Faatonu Sili o A'oga a le Ekalesia, e faapea e toatele nisi tamaiti ua oo i le Year 9, vasega 9, e le iloa sipela o latou igoa. E talitonu gata lea mea. A o le mea lea na maua i le asiasiga a le Faatonu Sili o A'oga a le Ekalesia.

O fea e mafua mai ai le leaga lea? E lua mafuaaga ou te talitonu iai: Muamua, o le leaga o le a'oa'oina i primary schools, poo a'oga tulagalua. O lona uiga, e le o tatou e mafua ai, aua
faaa'ua'ua itulau e sosoo ai

O LE LAUGA

mai le itulau e 3

ua aumai - o le pepe - Ua avea ma faailoga maualuga ma le silisili a le Atua, ua mafua ai le faamoemoe o le Ateveni o loo tatou vaavaai atu iai. O le faaliliuga lea o le natura o le Atua e ala mai i le tino tagata faapei o i tatou. Ua ia te ia uiga uma o le Atua, ua faigofie ai mo i tatou ona saili le Atua i lona auai mai. Aua o le Atua na faia le tagata i lona faatusa paia, ma o le pepe ua fanau mai i le Aso Kerisimasi, o ia lava o le Atua. Ua afio mai lava, ua faatasi foi ma tatou.

Ioe, o le faailoga lea o le alofa mai o le Atua. Ua aumai ai le feau ia 'A'asa e ala i le faailoga o le

pepe - o le faaoo mai o le filemu. Fetalai le Atua: "Ia oe, ia e ffilemu, aua e te fefe, aua nei faavaivai foi lou loto, ona o ia iu aulama e lua ua pupusa." Aua e le oo lea mea. E lei tupu se mea, ae na faata'ape'apeina ma faato'ilaloina 'au a Resina o Suria, ma Peka o Isaraelu. E ese faiga a le Atua, pei ona faia i na tupu loto faamaualuluga, ae faasaoina ai 'A'asa ma Iuta, e faapea foi ona faia mo i tatou, pe afai tatou te lagona le filemu ma le olioli loloto i le faatasi mai o ia ma le malosi o lona mana.

Ua tatou nofo sauni mo le soifua mai o le pepe o le Kerisimasi. O

le faailoga o le Atua auai ma le Atua ua faatasi ma tatou. Ua ia aumaia le filemu, ae aveese le fefe ma le popole. Ia lagona ai e tatou le loto maualalo, tatou te talitonuina ai ma le faatuatua lona alofa ma lona faamaoni e faataunuu ai ma tausia e ia ana folafolaga. E ala i lona auai mai i le pepe o Peteleema - o ia o le Emanuelu, o lona uiga, ua ia te i tatou le Atua.

O le tatou faafetai lea i le Atua, taimi nei ma aso uma lava, ona o ia lava o Emanuelu.

Fai mai le tasi taitai lotu Kerisiano - "O le mea sili ua ia te i tatou le Atua."

Manuia le Kerisimasi faapea ma le Tausaga Fou.

Luapene Nepo FS,
EFKS Afega.

E le Iloa Sipela e Tamaiti Y9 o Latou Igoa

O le Togafiti: Ave Tamaiti i le A'oga a le Faifeau

O lona lua o mafuaaga: o le le avea o tamaiti i a'oga a le faifeau. E toatele lava matua e manatu mama i le A'oga a le Faifeau. 'A' o ina e tele mea e a'oa'o ai. O le amio, o le Tusi Paia, ma le Gagana Samoa. Ou te ta'utino atu, a na le lelei ona a'oa'oina o a'u i a'oga a le faifeau i le Gagana Samoa, ou te le oo i le mea ua ou iai nei, ma manuia ua ou maua i lo'u olaga. Na ou iloa ai faitau tusi, ma tusitusi, ma tusi tala mai le Tusi Paia. Ma faitau le Tusi Paia. Ma ou iloa ai foi sipela lo'u igoa, aua o le upu muamua lava lena e a'oa'o mai e le tina o le galuega, ia e iloa sipela ma tusi i lalo lou igoa. O le mea foi lea ou te talitonu ai, o tamaiti ia e to'a 20 e le iloa sipela o latou igoa, e le'i o i ni a'oga a faifeau. Aua o le upu muamua lava e a'o i le a'oga a le faifeau, o le tusiga o lou igoa. Matua, matua e, ave tamaiti i le A'oga a le Faifeau. 'Aua le avea iai na o le taimi o le Lotu Tamaiti, poo le

taimi o le Kerisimasi ina ia maua ai ni a latou meaalofa. Ave i le amataga o le tausaga, ma tuu ai se'ia oo ina uma le tausaga faa-A'oga a Faifeau. Ma 'aua le tuuina le a'oa'oga o a tatou fanau e na o faia'oga latou te faia. E matua tele lava le vaega a tatou matua e tatau ona fai. O le tatou saunia o se siosiomaga saogalemu, filemu, ma saoloto, e fai ai mea aoga a le tamaitiiti. Ae le maua le siosiomaga lea, pe a e alu i le Bingo i afiafi uma, ae tia'i tamaiti i le fale e leai se isi e vaai.

Ina ua amata auina i Niu Sila i le tausaga e 1945 tamaiti mai Samoa e a'oga ai faasikolasipi, o le toatele o latou na o, e mai A'oga a Faifeau. Aua e le'i iai ni a'oga tulagalua i le tele o nuu i Samoa. Sa leai foi ni kolisi e pei ona iai nei. Tama ma teine o le Kolisi o Tuasivi, e leai ni kolisi i o matou aso. O a'oga lava a faifeau sa feagai ma le aoaoina o fanau a le atunuu. Sa ave foi iai ma nisi o fanau a aiga

Katoliko e a'o ai le latou faitau tusi ma tusitusi. Ia manatua foi e outou matua, e le totogia le a'oga a le faifeau. E a'oga fua lau tama. O le mea lea, ave lau tama i le A'oga a le Faifeau e a'oga fua ai. E a'oa'o ai le amio, ma iloa ai sipela lona igoa, ma faitau tusi. Ae le alu ai sau tupe. E leai se pili o le A'oga a le Faifeau.

Fai mai le tamaitai porofesa o le Gagana Samoa, Afioga Aiono Dr. Fanaafi Le Tagalaoa, na ala ona vave ona lelei la'u Igilisi, ona na lelei le a'oa'oina o la'u Gagana Samoa, i le A'oga a le Faifeau. O le Gagana Samoa, ma le Igilisi, o nisi ia o mata'upu ou te feololo ai a'u. Ae mafua mai i le A'oga a le Faifeau.

Mo outou e vaivai i le Igilisi, ou te iloa tou te le silafia, o lou tou pule, le Susuga Makesi Alai, e matua lelei lava i le mataupu o le Igilisi. E lelei ona tusi pasi ma ona faailoga i le Igilisi. E iai i le faiga

faaauau itulau e sosoo ai

O le Lisi o Faamoemoega ma Moomooga

O a'u o se fafine talavou ua toatolu le fanau teine a ua leai se toalua, oloo togitogi le aitalafu o le fale, ma le taavale e le'i taitai foi ona uma ona totogi. Ua oo mai ia te au le toe fia faamumuina o o'u lagona i mea ou te mana'o iai. Ua toe fia faataunuina le tele o a'u miti o fai i lea aso ma lea aso.

O se isi afiafi na ou alu ai i se semina ma ou faalogologo i se tamaloa o fai sa na tautalaga i le mataupu: "O Mafaufauga e filo ma ni ata manino i lou mafaufau i mea e te moomoo iai, e oo lava ina tino mai."

Na avea lea tautalaga ma mea e fevesia'i ai lo'u mafaufau. Ou te iloa lelei le mea moni mai le Tusi Paia o loo faapea mai, "Ia e fiafia lava oe i le Alii, ona foaiina lea e ia ia te oe o mea e mana'o iai lou loto." - (Salamo 37:4). Ae le gata i lea, "Aua e pei ona manatu o ia i lona loto, ua faapea lava o ia..." - Faataoto 23: 7). Ua ou filifili nei, o le a aumai la'u lisi o ou moomooga poo a'u talosaga, ma fai ni o latou ata. Ua ou 'oti'otia mai

mai nusipepa ni ata e mafai ona faaata ai o'u moomooga, ma tuu i la'u tusi ata. Ona ou faatalitali ai lea. Na manino lelei lava ata o mea na ou mana'o iai. E aofia ai:

1. Se tamaloa aulelei.
2. O se fafine i lona 'ofu faaipoipo o savavali atu i luma ma se tamaloa e fai lona suti ma lona fusiua puupuu.
3. O teu fugalaa.
4. O ni taimane matua mananaia. (Na ou mafaufau o le Atua sa alofa ia Tavita ma Solomona na ala ai ona avea i la'ua ma ni tagata milionea).
5. O se motu i le Karepeane.
6. O se fale manaia.
7. O ni meafale mananaia.
8. O se fafine faato'a avea ma peresitene lagolago o se kamupani tele. (Sa ou galue mo se kamupani e le'i oo lava se tamaitai i se tulaga pule).

Pe tusa o le valu vaiaso mulimuli ane, na ui atu ai la'u taavale i le motouei i Kalefonia i le itula e 10.30am, ae ma'alo ane se taavale Cadillac. Na ou vaai lelei i le taavale aua e matua manaia lava.

Ae vaai mai ia a'u le avetaavale ma 'ata. Na ou 'ata fo'i iai. Ua tupu le faalavelave! Ua ou faataga le amana'ia nei le taavale a le tamaloa. Peitai, ua ou fiu e 'o'omi le vae o la'u penisini, ae o le la e mulimuli mai lava le taavale a le tamaloa. Atoa le 20 maila o mulimuli mai lava! Na oo ina taofi la'u taavale ma paka i tafatafaala, ae tu foi le taavale a le tamaloa ma paka mai i tua o la'u taavale.....ma faapena ai lava se'ia oo ina ma faaipoipo.

A o le'i oo ina ma faaipoipo, na o le auina mai e Simi (o lona igoa lea) teu fuarosa mo a'u. O a ma talatalanoaga na ou iloa ai, e fiafia tele i taimane, ma o loo ia su'ea se isi e na te faa'ulaina i ana taimane. Na ou ofo iai a'u. Lua tausaga o ma feoa'i, o Aso Gafua uma lava o ia tausaga, e lafo mai ai se rosa mumu e umi lona 'au, o faapipii ai se pepa o tusia ai ona alofaaga mo a'u.

Toe tolu masina fai le ma faaipoipoga, ae fai mai Simi, "Manaia ia o le motu i le Karepeane ua ou manatu ta te tafafao ai pe a ta faaipoipo." Na ou 'ata a o le taimi lea na ou manatua ai foi le lisi o ou moomooga o loo tusia ai se motu i le Karepeane.

Faato'a ou ta'ua lava ia Simi le tusiata o iai le lisi o o'u moomooga, ina ua atoa le tausaga talu ona ma faaipoipo. O le taimi lea na ma sii atu ai i lo ma fale fogafalelua manaia, ma la'u atu iai a ma meafale fou mananaia. E valu masina talu ona fai la'u tusiata o

faaauau itulau e 6

E le Iloa Sipela e Tamaiti Y9 o Latou Igoa

O le Togafiti: Ave Tamaiti i le A'oga a le Faifeau

o pepa o su'ega o le Igilisi mo Kolisi i Samoa nei, ma iai foi i le togiina o pepa o su'ega. O la'ia e la'u iai lau tou Igilisi panupanu ma pisipisi solo, faitalia ia ma faasa'osa'o. O e fenanui iai. A ia outou manatua, o le Gagana Samoa lea e sili ona outou leaga ai. 'A 'o outou o tamaiti Samoa. A maulalo ou togi i le Gagana Samoa, e toso i

lalo e togi na le aofai o ou togi mai au mataupu uma, ma le maua ai sou tulaga lelei i le vasega.

Manuia outou o le a tu'ua le Kolisi o Tuasivi i lena tausaga. O le a outou fetaia'i ma lu'itau o le olaga. Ae faamoemoe i le Atua, e fesoasoani mai i lou tou lumana'i.

Mo outou e toe fo'i mai, manatua upu na ou ta'ua atu: Faamaoni,

Sogasoga, Tauivi, ma Finafinau. E le 'asa lava faamanuiaga e oo i le tama ma le teine e faamaoni i le faiga o ana mea a'oga.

Manuia le Kerisimasi, ma le Tausaga Fou! Soifua.

Afemata T. Apelu Aiavao
Sui o le Komiti o A'oga

MATINI LUTERU

1483 - 1546

O le Auupega o le Toe Fuata'i

Na avea Katherine, le faletua o Matini Luteru, ma fesoasoani tele ia te ia i le faamaopoopoina lelei o ana tupe. Ona o le lima foa'i o Matini, o lea e tele ai lava ina leai se tupe e totoe i le faletupe mo lo la aiga. Fai mai Luteru, "Na fai e le Atua tamatama'ilima ina ia faigofie ai ona mamulu atu tupe i lou lima." Ua taofiofi nei e Katherine le 'atotupe ma oo ai ina maua a la tupe, seia oo lava ina lava e faatau ai mea aoga la te manana'o iai.

Ua alia'e nei ia Katherine se taleni e le'i aliali i le taimi sa nofo ai i le koneveni (convent). E talenia faa-pule o galuega; faa-tagata e fai ni ona fale ma totogi; ma faa-pule sili. Soo se mea lava e pulea ma vaaia e Katherine, e ola. E mafai foi ona faaupu i se isi itu: e lima ola le faletua.

Sa nonofo Matini ma Katherine i le monaseri o le Itu'aiga o

Aukusotino, i se fale lea na tuuina atu ma'oti faale-tulafono e le malo mo la'ua. E 40 potu o le fale, ma e sea sea ona gaogao potu o le fale i le tumu ai o tagata. Na oo ina maua le fanau a Matini ma Katherine e to'a ono, faaopoopo atu iai ma ni tamaiti se to'a ono mai o la aiga; ma ni tamaiti ua matua oti. Faapea ma nisi o aiga o Katherine na o atu e latou te nonofo ma fesoasoani ia Matini ma Katherine, e aofia ai ma Matalena le loomatua o le aiga o Katherine, lea ua fai ma nani o tamaiti.

Sa nonofo ai foi ma ni faiaoga ma tamaiti aoga, e mau totogi. E le'i masani ai Matini ona nonofo faatasi ma ni tagata se toatele, ae na oo lava ina masani ma fiafia iai. Fai mai Matini e uiga i lona atalii o Anisi, "A vaai mai o o'u tusitusi i luga o la'u laulau, ona sau lea ua pese mai ia te au. A leotele naunau le pese ona ou otegiaina lea, ae

atili ai ona pese fiafia."

Talanoaga i le Laulau Taumafa

Na avea le nonofo faatasi o lenei aiga toatele ma mea e a'oa'oina ai pea tama a'oga i manatu ma talitonuga o Matini Luteru. Na oo ina ta'u le taimi lea o a latou talanoaga o le taimi o "Talanoaga i le Laulau 'Ai" E lolofi atu tama a'oga ia Matini, ma fesilisili iai, ae tali ane le alii faifeau, ae tusitusi i lalo e tamaiti tali a Matini ia latou 'api. Sa mana'o Katherine e totogi se tupe e tama a'oga ia Matini e tusa ai o mea o ia a'oa'oina i tama. Ae le talia e Matini. Ma oo ai ina o tamaiti ma lomina mea na latou faalogologo ai ia Matini.

E nofo Matini i le isi pito o le Laulau 'Ai, ae nonofo Katherine ma tama a'oga i le isi itu o le laulau. E oo ina fiu Katherine i le tele o fesili a tama; ae le gata i lea, o le le mafai ia Matini ona maua se taimi e fai ai lana taumafataga. O se isi la aso a o fai foi le talanoaga, na fai atu ai Katherine, "Le Foma'i e, ae a pe a tuu ia lau talanoa ae se'i fai sau mea taumafa?" Ae fai mai le tali a Matini, "E tatau i fafine ona fai mai le Tatalo a le Alii a o le'i tautala i se mea."

E ui lava sa tau faamasani Matini i uiga o Katherine, ae sa tele lava lona faalagolago ia te ia ma ona uiga lelei ma le malosia, e tau fesoasoani i ona uiga vaivai.

Sa ta'ua e Matini ia Katherine o "lo'u ivi 'aso'aso"; "o la'u filifili u'amea". ma "o lo'u alii", ona o lona pulea lelei o lo la aiga. Ae tele lava isi mea o le aiga sa tatau ona vaaia e Matini ona o ia o le alii o le aiga, ae sa

faaaauau itulau e 16

O le Lisi o Faamoemoega ma Moomooga

o'u moomooga, ae tofia a'u e avea ma peresitene lagolago o le kamupani lea ou te faigaluega ai.

E le taumate e ono le talitonuina e le toatele o tagata lenei tala, a o le mea moni lava lea na tupu i lo'u olaga. Talu ona ma faaipoipo ma Simi, ua tele a ma tusiata o ma moomooga ua fai, Ma e sa faamaoni le Atua ma ia faataunuina o ma faamoemoega na faia i le talitonu ma faatuatua

ia te ia.

Filifili poo le a le mea e te mana'o iai i soo se vaega o lou olaga. Ia e mafaufau manino lelei iai. Ona faaata lea ma tuu i se tusiata. E leai ni miti e le mafai ona le ausia. Ma ia manatua, ua folafola mai e le Atua, ".....e foaiina e ia ia te oe o mea e mana'o iai lou loto."

tusia e Glenna Salisbury

Pepa mai le Mafutaga a le Matagaluega

Apia Sasa'e - 16-17 Iulai 2014

Feagaiga Tuai: Tusi a Isaia

Saunia e

Rev. Siaso Samoa

mau - muamua, e tele ina faaaoga faa-tusi sii e tusitala o le Feagaiga Fou. Lua - e toetoe 'a le misi i soo se tausaga i le faatulagaga **O le Tusi Faitau Aso** a le Ekalesia, aemaise lava i le vaitau o le Etiveni, pe a sauniuni ma tapena le Ekalesia mo le fanau mai o Keriso, o le sui o le laina o le tupu o Tavita, le ua faauuina.

A le o lena, e masani lava ona faaaoga i le vaitau o le Leni, a o sauni atu le Ekalesia e faamanatu le maliu ma toe tu mai o Keriso, aemaise lava i taimi o puapuaga o le Alii; ona e iai tusitusiga e ta'ua o tusitusiga i le "auauna puapuagatia", o ni vaega taua o le tusi a le perofeta, e fetau lelei lava ma le agaga o lea vaitau faa-Kerisiano.

E iai manatu faa-Isaia na to'ia ai le Ekalesia, lea e afua ai lona aliali soo i tusitusiga a le Feagaiga Fou, faatasi ma lona taua i faatulagaga o tusi failotu a le Ekalesia. E pei la o lenei: O le talia o le Mesia mai le laina o Tavita na te faavaeina se pule'aga amiotonu. E le gata i lena, ae oloo faaataata mai ai foi ma le isi manatu - e iai le fesoota'iga o lea tofiga faaauau o le aiga o Tavita, ma le tofia o Siona/Ierusalem e fai ma aai pa'ia o le Atua, ma o se aai e malu puipua e le Atua lava ia. I le ma lenei, o le faaeaeaina o le Atua i lona ta'uga - "O le

Pa'ia o Isaraelu". O le Atua e ui ina pei o se tau faamata'u ma se tau faafefe ia Isaraelu, ae le o se Atua o mamao ese ma lona nuu, a oloo lotolotoi ma ona tagata.

O le Tusi a Isaia

O Isaia e faaupu e tagata o le "Messianic Prophet", poo le perofeta na valo'ia le Mesia, ona o le tele o ana valo'aga ma tusitusiga, na faataunuuna uma i le toe afio mai o Iesu. O faamaumauga o le Feagaiga Fou e faapea, e tele lava ina faaaoga fuaitau o le tusi a Isaia, nai lo se isi lava tusi o le Feagaiga Tuai.

O le tusi a Isaia, e le na o ni tusi i valo'aga i mea e tutupu i le lumana'i, ae o le tusi i se perofeta a le Atua na talaina le finagalo o le Atua i tagata o lona lava vai taimi le Feagaiga Tuai. O le upu "prophet" poo le perofeta e faapei o se punavai e puna a'e. O le mea lea e faaupu ai faapea o le perofeta o Isaia, o se sooupu mo le Atua, poo le "spokesman for God". O Isaia o le sooupu a le Atua mo Iuta (Judah) ma Ierusalem, i le taimi o le ola agasala o nei tagata. Na ia talaina le to'asa o le Atua, ma le tau e tusa ai ma a latou agasala. Ma oloo augani atu le perofeta ia latou fulitua, ma toe fo'i atu i le Atua. Na faailoa atu foi e le perofeta le iuga ma le mea e oo iai le toasa o le Atua pe afai latou te le liliu

mai i le Atua.

I ia foi vai taimi o le ola faapaupau ma le agasala o tagata Iuta ma Isaraelu, na valo'ia ai e Isaia le afio mai ma le matagofie o le Mesia. E le'i galo i le Atua lana ta'utinoga na faia ia Aperamo, Isaako ma Tavita. Na te aumaia le faaolataga i le nuu o Isaraelu i le afio mai o le Mesia ma lona malo fou.

Faamatalaga o Isaia

O le igoa o Isaia e faaupu faapea: "Faaolataga a le Alii" (Salvation of the Lord) pe faapea foi, "O le Atua o le Faaolataga" (The Lord is Salvation), ma oloo pine lea i lana tala'iga i le Feagaiga Tuai. O ia o le atalii o Amota (Isaia 1:1-2, 3:1), ma e leai ni faamaumauga e tele o lona tama. E toalua ona atalii - "Sarasopa" (Shear-Jashub) - the remnant (faaolataga) shall return - Isaia 7:3, ma Maeli-salasa-pasa (Maher-Shala-Hash-Baz) Isaia 8:3). O igoa o ona atalii oloo faamatala manino mai ai foi le upu a le Atua.

E tusa ai ma tusitusiga, o Amota (Amoz) o le uso o Amaziah le atalii o Iosefatu le tupu o Iuta (11 Tupu 14:1). O le sootaga tau tupu lea e vava lalata ai Isaia i Nofoaiga a Tupu o lona vai taimi, ma oloo faamatala ai foi le galulue faatasi ai o Isaia ma le au ositaulaga faapea ma tupu i ia vai taimi. Na maua e Isaia faaaliga i vai taimi o avea Usia, Iotama, Aasa ma Esekia (Isaia 1:1) ma tupu o Iuta.

O faamaumauga e faapea o le Nofoaalii (throne scene) na tupu i le vai taimi na maliu ai Usia (Isaia 6:1) ma e faapea o le taimi *faaauau itulau e sosoo ai*

Feagaiga Tuai: Tusi a Isaia

mai le itulau e 7

tonu lena na amata ai le galuega tala'i/valo'aga a Isaia (8 senituri).

O Isaia na fasiotia e Manase i le uluai tausaga na avea ai o ia ma tupu. E faapea tusitusiga, o Isaia na fasiotia i se 'ili laupapa (wooden saw) Eperu 11:37. O lona uiga o Isaia na faia valo'aga tetele i le vai taimi e latalata ane i le 50 tausaga (739-690 BC).

I le Vai Taimi o Isaia

O ia ona po na malosai ai faigamalo faapolokiki a Iuta. Na faateleina le 'autau a Asuria, (Assyria), ma faasaga tau atu ia Isaraelu ma Suria i le itu i Matu. Ina ua le taliaina e Iuta le tuu faatasiga o a latou vaega'au ma Isaraelu ma Suria e tali atu i le ma'ema'ea o Asuria, na faate'ia Iuta i le osofa'i atu o latou e Isaraelu ma Suria. O ina na faaoo atu ai e Iuta se talosaga e avatu ia Asuria mo se fesoasoani ona ua faasaga tau atu Isaraelu ma Suria ia i latou.

Peitai sa talosagaina e Isaia le malo ma le tupu o Iuta, ia faamoemoe ma faatuaua i le Atua e fai ma auupega o le taua. O le tupu o Iuta e suafa ia Aasa na ia teena le talosaga a Isaia, ma faato'ai atu ai loa ia Asuria le talosaga ma latou faatoilaloina ai loa Isaraelu i le 722 BC (TLM).

E lei mamao foi ae faailoa mai o Iuta oloo iai i le lisi a Asuria na te faatoilaloina. Na sulufa'i atu Iuta i le itu i saute ia Aikupito, mo se fesoasoani. Na toe talosaga atu foi Isaia i lea vai taimi ia Iuta, ina ia tumau i

le faatuatua ma tuu atu faamoemoega o le taua i le Atua, ae le o nuu ese.

Na talia e Hezekiah le tupu o Iuta le apoapoa'i atu a Isaia, ma i'u ai ina manumalo i le taua (Isaia 36-37). I lea lava vai taimi na tuuina atu ai e le Atua perofeta ia Isaraelu ma Iuta - 1. Hosea (750-725 BC) na fai o ia ma perofeta i le aai o Ierusalem. 2. Mika (735-700 BC) na la galulue faatasi ma Isaia, e fai perofetaga ia Iuta i le itu i Saute.

Tusiina o le Tusi

O le eseese o fatu gagana ma mataupu silisili mai lea vaega i lea vaega o le tusi, na a'e ai se manatu i a'oa'o su'esu'e o le Tusi Pa'ia: "E le tasi se lima na tusia le tusi atoa. O le talitonuga o le au su'esu'e o le Tusi Paia, e tolu lava tusi ma'oti oloo tuu faatasia i totonu o le tusi atoa lena i le perofeta o Isaia. Ma e eseese foi vai tau o le talafaasolopito o Isaraelu na tusitusia ai nei tusi, ua taua i le gagana sutesue nei tusi o le (1) Isaia muamua, (2) Isaia e lua, (3) Isaia e tolu.

A. **Isaia Muamua** (Isaia 1-39) I le Isaia muamua e amata mai le mataupu muamua seia oo i le mataupu e 39. O tusi na tusia i le senituri e 8 a o lumana'i le Mesia (TLM), i le taimi ua vaeluaina Isaraelu, ma ua eseese foi ana faigamalo. O Isaraelu i le itu i matu, ma Iuta i le itu i saute. O le na tusia vaega ia o le perofeta o Isaia, o le atalii o Amota o Ierusalem. O lona uiga o le perofeta mai le malo i

saute o Iuta. O le uluai fuaiupu lava o le tusi, sa galue o ia faaperofeta i le vai tau o nofoaiga tupu e fa: "Usia, Iotama, Aasa ma Esekia". O auga tupu ia o Iuta. Isaia 1:1-39:8 o le faamasinoga/iuga o Iuta ma le lalolagi. Peitai, e mulimuli ane ona aumaia lea o faamanuiaga o le malo mo Isaraelu.

* Isaia 1:1: O le faatomuaga o le tusi. Oloo faailoa mai ai o le vaaiga na vaai iai Isaia le atalii o Amota, i taimi o auga tupu o Usia, Iotama, Aasa ma Esekia. * Isaia 1:2-6:13: Na ala mai ia Isaia le tuua'iina o Iuta i lo latou o ese ma le feagaiga ma o lana sala o le faatafeaina. Peitai o le a iai vaega faatuatuaina toaitiiti e ala mai ai lona toe faatuina.

* Isaia 6:1-12: O le valaauina o le perofeta i le toe faafo'isia/faaolaina o le nuu.

* Isaia 13:1-23:18. O le valoaga a Isaia i le faamasinoga/iuga o le a oo i nuu ese.

* Isaia 24:1-27:13. O folafolaga o le a oo mai o le faasalaga o le lalolagi ma Isaraelu, ae mulimuli mai ai ma faamanuiaga o le malo mo Isaraelu.

* Isaia 28:1-33:24. Laugaina e Isaia o le iuga o Isaraelu, faatasi ma le faamoemoe e toe lavea'iina ma faamanuiaga.

* Isaia 34:1-35:10. O le tau ma sui o le Atua i nuu ese, ma faamanuiaga i le toaitiiti faatuatua.

* Isaia 36:1-37:7. O faamata'u a Sanerivi le tupu o Asuria ia Esekia ma Ierusalem ma le tumau o le faatuatua o Esekia i apoapoa'iga a Isaia.

* Isaia 37:8-38. Faato'ilaloina o Asuria e le Atua ona o le faatuatua o Esekia.

faaauau itulau e sosoo ai

Feagaiga Tuai: Tusi a Isaia

mai le itulau e 8

* Isaia 38:1-22. O le tatalo a Esekia i le Atua ona o lona ma'i.

* Isaia 39:1-8. O le seetia o Esekia ma faaali ai lona tamaoaiga ia Papelonia, na ala ai ona faatafea i Papelonia.

B. Isaia Lua (Isaia 40-55)

O le tusi lona lua e amata mai i le mataupu e 40 seia oo i le mataupu e 55. E ese foi lana gagana, ma lana faamamafa. E manatu le toatele, o le vaega lea na tusia ma isi lea na faatafea i Papelonia. O le tusi foi lea na tusia mai lava i le mea o iai le tafeaga pe tusa o le 597-538 TLM.

Na faamalosi atu Isaia i tagata o Iuta ina ia maua e i latou le faatuatua ma le loto onosa'i. Na ia faamatala le faaolataga ma manuia e tele i le lumana'i e maua e le Isaraelu moni o le Atua. E ui e le'i soifua Isaia i le taimi na faatoilaloina ai e Papelonia Isaraelu ma Iuta, ae peitai o ana upu faamalosi'au, na lagona pea i loto ma agaga o nei malo i ia vai tau o le pologa, ma o upu faamalosi foi ia a le Atua e auala mai ia Isaia, na fai ma faola totoga i ia tagata i taimi o puapuaga.

* Isaia 40-66 oloo iai valoaga ma upu faamafanafana, upu faamalosi'au, na lagona e le fanau a le Atua i taimi o le pologa i Papelonia.

* Isaia 40. Oloo faamamafa pe faamatalaina ai le faamafanafana (comfort) e auala mai i le afio mai o le Alii o le faaolataga.

* Isaia 40:3-5. O Isaia foi na ia tala'i le matagofie o le Atua, le Atua foi lea na te fesoasoani

i e oloo faatuatua moni ia te ia, ma faamoemoe atu ia te ia.

* Isaia 41. O le mata'utia o le Atua na to'ia ai malo taitasi. Sa ia a'oa'oina Isaraelu ina ia auane'i fefefe pe mata'u aua e le tuulafoa'iina i latou e le Atua.

* Isaia 42-43. Oloo faamatala mai ai e alofa le Atua ia Isaraelu, e auala mai i le afio mai o Iesu Keriso (Isaia 42:1-4) ma lana pule'aga i malo uma e oo foi ia Papelonia.

* Isaia 44-45 na faamautinoa ai, o Isaraelu o le nuu o le Atua, ma na folafola e le Atua na te faasaoina mai lona nuu mai lima o Kuresa (Cyrus) o Peresia. E toatele i latou na liliu i le Atua ona o lea vavega na faia e le Atua.

* Isaia 46-48 na valo'ia ai o le a oo mai le faatoilaloina o Papelonia, ma fuafuaga mo Isaraelu. O tupua (idols) o Papelonia e le moni lea, ma e le mafai ona latou faia vavega tetele e pei ona faataunuaina e le Atua. O le to'asa o le Atua o le a gatete uma ai Papelonia, ae faasaoina mai ai Isaraelu, o vavega nei na fulitua ai Isaraelu ma toe foi ai i lona mamalu.

* Isaia 49-53. O le auuuna na maua ai le faaolataga ia Isaraelu. O le malamalama (light) ma le faaolataga o le a maua foi e tagata o nuu ese - (gentiles). Valo'aga i le Mesia, na faatigaina ma fai ma togiola o tatou tagata agasala.

* Isaia 49. Oloo faamatala mai ai le faaolataga o Isaraelu ma fai ai le Atua ma malamalama (light) i nuu ese (gentiles). E foa'iina mai e le Atua le Mesia na te fesoasoani ma fai ma laveai i tagata puapuagatia. O

Siona (Zion/Jerusalem) le na faapea tusitusiga na tuulafoa'iina e le Atua, ae na toe alofaina e le Atua ma toe faasaoina mulimuli.

* Isaia 50-52. O le Mesia o le a fai ma faamoemoe (hope) o Siona (Ierusalema Fou) ua fautuaina ia fulitua i le agasala, aua e mafai lava e le Mesia ona faasa'oloto i latou.

* Isaia 52-53. Oloo faamatala mai ai le tigaina o le atalii o le tagata (Iesu), e amusia, ma tuua'ia e tagata, ae peitai na fai o ia ma togiola o tagata uma e faatuatua ia te ia. Tatou te molimau foi, e moni lava ma faamaoni nei valoaga i tagata Isaraelu, ma le saolotoga na maua e tagata o nuu ese.

C. Isaia Tolu (Isaia 54-66)

O le vaega e tolu e amata mai i le mataupu e 54 seia oo i le iuga o le tusi i le mataupu 66. Na tusia i le taimi ua a'e le tafeaga, ma ua fo'i e toe atiae ona lava laueleele faatasi ma le mamalu. Ma o le aotelega lea i le vaai ai i le mataupu 54-66.

* Isaia 54-55. Tele upu faamafanafana (comfort words) na fua faatatau i le faasalaga i Papelonia, ma i latou na aafia ai. O le faamamafa o le manuia e maua e tagata o le Atua. The future glory for God's people - o se faamanatu foi poo se tau'i ona o lo tatou amio leaga.

O le saolotoga o Siona o le manatu autu o le Isaia 54:1-56:8. Na poloa'i le Atua na te faaali le alofa ia i latou e tumau ia te ia e ui ina faigata faasalaga o le a fetaia'i ma i latou. Na tuuina atu foi se folafolaga (promise) a le Atua mo e uma na galala, ma e uma e manana'o

faaaauau itulau e 10

Feagaiga Tuai: Tusi a Isaia

mai le itulau e 9

i le fiafia ma le filemu ina ia onosa'i ma mulimuli atu pea ia te ia. E mafai foi e i latou o nuu ese ona maua so latou avanoa i le manuia pe a sa'o a latou amio ma mulimuli atu i le Atua. O le manuia oloo talanoaina e maua mai i le afio mai o le Mesia (Luka24:44-47, Eperu 12:22-29)

O faasalaga i Papelonia na faamanino mai ai le toilalo o le nuu o le Atua ma le toe faaolaina e ia lava. (Isaia 56:9-59:21). Faafea faamatalaga o le au ositaulaga ma le au faafia amiotonu na le tausisia o latou tiute tau'ave, ma o le maliu o le Atalii o le Tagata (Iesu) na fai ma faamanuiga ona sa aveesea ai a latou agasala ma a latou amio leaga. E leai so latou manuia na maua mai ia latou agasala e pei o le mulilua ma le gaio aemaise ai foi le le savalia lea o a latou upu. A o i latou ua maua i le loto maulalo ma le amiotonu, latou te maua le filemu o le Alii ma toe foi atu i ala o le Atua. Na fautua malosi Isaia i le motu o tagata o Iuta ina ia latou fultua i le leaga ma toe foi atu i le Atua moni. Sa folafola foi e le Atua le faaolataga e auala mai i le Alii Faaola (Redeemer) mo i latou uma latou te talitonu ma mulimuli ia te ia. O ina foi ua faamanino mai ai le faaolataga e maua e Isaraelu mai le pologa o le a latou faafesaga'i i Papelonia ae le gata o le afio mai o le Alii Faaola (Jesus Christ), ma aumai ai le ola fou

e ala mai i lona toto paia. (Roma 11:26-27).

* Isaia 60-66 oloo faamamafa mai ai le paia ma le mamalu o le a oo iai le faaolataga a le Atua ia Siona. O lenei mamalu o le a oo iai e manuia ai tagata uma e oo foi i tagata o nuu ese, e manuia faatasi atu ai i lea mamalu o le afio mai o Iesu le Mesia. Na folafola le Atua e auala mai ia Isaia na te le malolo seia toe foi tagata Ierusalema i le saolotoga ma le filemu ma fai lona nuu ma nuu e fa'a'amu'ia i ai nuu uma o le lalolagi. I le toe tepa i tua i le faamasinoga ia Etoma ma le saolotoga na faia e le Atua ia Isaraelu, na tatalo Isaia o le malaia (Papelonia) o le a faafeagai ma Isaraelu o le a toe faasaoloto foi e le Atua i latou ma fausia ai se isi olaga fou (new creation) mo i latou uma e talia o ia ma mulimuli pea ia te ia. O le folafolaga a le Atua na ia faasilasila ai malo oi le lagi ma le malo fou o le a ia tapenaina ma fai lea ma faamoemoega poo se faamalosi'au i tagata o Isaraelu

i taimi o faigata i sauaga i Papelonia. O valo'aga mulimuli a Isaia oloo tausisi pea i le tumau o le alofa o le Atua i ona tagata ma e faamamafa i e matitiva ma loto agamalu ma loto maulalo ma toe fetalai foi i upu faaola totoga i tagata i taimi puapuaga o le a oo iai (Babylonian Captivity) ma le saolotoga mulimuli e maua pe a onosai ma faamalosi pea i le Atua.

O le talitonuga o nei valoaga uma na taunuu uma i le afio mai o le Mesia. I le Peteru (2 Peteru 3:13-18, ma le Ioane (Faaaliga 21-22) oloo faamanino mai ai le toe afio mai o Iesu i lona toe afio faalua mai i le faamasinoga tele (final Judgement).

I ia la vaega eseese o le tusi a Isaia, e amata mai i Iuta faasolo ane i Papelonia, ma toe faaiu i Iuta ma Ierusalema, faatasi ma mea a tutupu ma ona mafuaaga, e mafai ai ona faapea, o le feau taumolimoli o le tusi a Isaia e faapea: "*O le Atua na galue lava mo Isaraelu; na te faamasino mea ua sese ona fai e lona nuu. Peitai oloo taoto lava foi le faaolataga, o se faaolataga mautinoa i le lumana'i.*"

O le Patipati a le Lagi

Toeitiiti lava a e taunuu. E le taumate e te le o matauina, a o le mea moni, toetoe lava a e oo. O minute taitasi, o laasaga i luma. O manavaga taitasi, o se itulau fou ua susu'e. O aso taitasi o se maila ausia, poo se mauga ua sopo'ia. Ua e latalata lava i le tini! E aunoa ma lou matauina, ua oo mai lou taimi taunuu. O le a e ifoifo i faasitepu ma ulufale atu i le 'A'ai. O le a e iloa atu nisi e te masani ai. E te faalogo atu foi o ta'u e tagata e alolofa ia oe lou igoa. Ma e ono tupu, ioe, e te ono vaaia i tua atu o nei tagata uma, o le a e iloa atu ai Le e sili ia Ia ona oti i lo le ola e aunoa ma oe, o le a sisii a'e ona lima na tu'itu'i i fafo, sa sulu i taga o lona ofu talaloo, ma patipati, ua fiafia ua e taunuu.

- Max Lucado

Ia e A'oa'o mai ia te a'u e faia lou finagalo

I le tau faaiiuga o le tausaga e 1891, na faigata i le alii o Wilfred (Uilifereti) Grenfell ona fai lana faaiuga pe alu i Newfoundland pe leai e asiasi i falei'a i lea motu tele, e pei ona fautuaina ane e se tasi o ana uo.. O le faalavelave, e iai foi isi mea o tutu mai i ona luma e tatau ona ia faia. Muamua, faato'a uma ana a'oga faafoma'i i le Iunivesite o Oxford, ma e tatau ai ona faigaluga e fesoasoani i lona aiga. O lona lua, faato'a te'a se sauniga faa-evagelia a le failauga ta'uta'ua o Dwight L. Moody, lea na tuuina atu ai e Uilifereti lona ola mo Keriso,

ina ua uma ona faalogologo o ia i le lauga a le fai-evagelia.

Na fiasia o ia i le avanoa na tuuina atu e lana uo e malaga ai i Newfoundland, ae i se isi foi itu, o le a le avanoa ai o ia e faataunuu nisi o ona tiute o se Kerisiano ua ofoina atu lona ola mo lona Alii.

Ae ina ua fesili atu Uilifereti i lona tina pe o le a le mea e tatau ona fai, na ia tali ane i lana tama e faapea: "Alu e faaoga i lou ola i aso uma upu o le Salamo 143:10: "Ia e a'oa'o mai ia te a'u e fai lou finagalo; aua o oe lava lo'u Atua; ia ta'ita'iina atu a'u e lou Agaga lelei i le

laueleele laulelei."

Na oo ina malaga Uilifereti i Newfoundland, peitai e le mo se tafaoga asiasi i falei'a. E 42 tausaga o galue ai Uilifereti i Newfoundland ma Labrador o se misionare foma'i, ma na faatuina i le tele o ia aai ni falema'i ma ni a'oga mo tausima'i, sa faaogaina ai ni vaaafi ma ni taavale see i le kiona e tosoina e ta'ifau.

O se a'oa'oga tele lea mo tatou, poo le a lava le mea e te filifili e faia i lou olaga, fesili i le Alii e fesoasoani mai ia te oe ina ia e faia lona finagalo, ae le o lou loto. E manuia ai mea e te fai.

E manino foi i lenei tala, o le tina o Uilifereti o se tama'ita'i e faitau Tusi Paia, fua ina ia manatua ia upu mai le Salamo: "Ia e a'oa'o mai ia te a'u e fai lou finagalo; aua o oe lava lo'u Atua, ia ta'ita'iina atu a'u e lou Agaga lelei i le laueleele laulelei."

O le Lima Foa'i ma Fesoasoani

lea e tusi ai mea na ou faia i lea aso ma lea aso. O mea e aoga e faamanatu mai ai mea na fai, o mea e le'i taunuu ona fai, ma mea sa faamoemoe e fai.

Na oo ina ou tau atu i le faamaumauga o le isi aso, o tusi ai se Faaaliga o ni mea mai aso anamua anamua lava mai le nofoaiga a le tupu Aikupito o Tutanekeamen, na faia i Los Angeles i le tausaga e 1978. Ua tele tausaga talu ona uma lea Faaaliga ae pei lava e le'i leva ona ou vaai iai, ona o le manaia tele o le Faaaliga. E tutu mai

pea i o'u luma faatagata ma le tele o isi mea tau Tutanekeamen.

Na ou matua naunau lava matou te o matou te matamata i lenei Faaaliga mai Aikupito e sea sea ona oo mai i Amerika. E tafa ata o le aso fou ae ou tu i le laina o tagata faatalitali i le taimi e tatala ai le fale e faatau ai pepa e ulufale ai mo le Faaaliga i le aso lea. E le'i taitai ona tatala le fale a ua umi umi lava le laina o tagata faatalitali - mai le faitotoa o le fale ma faasolo atu ai i fafo i le alatele ma luma o isi fale. Ae

faatatalitali lava tagata ma le onosa'i ona o le fia matamata i le Faaaliga tau Tutanekeamen.

Na ou oo atu i luma i le tama'ita'i o faatauina pepa ulufale, ma tuu atu iai la'u pepa o le masini e tusi faaaitalafu ai la'u faatau. Ae fai mai le fafine, "Malie, e le talia pepa ia, na o tupe."

Se mala paga! E le'i aumaia foi la'u tusi siaki, ae na o nai

faaauau itulau e 13

Transformation

He who sets out to change individual lives may be an optimist; but he who sets out to change society without first changing the individual is a lunatic.

Ua faasino e le Tamaitiiti le Tagata i le Satauro ma faamatala

I tausaga lava la ua leva, i se aai tele i Europa, i le tele o faleoloa i lea aai, oloo faaali ai i o latou faamalama tioata, ni ata valivali, *paintings*, ua lauiloa ai lea atunuu.

O ata nei e matua toatele lava tagata maimoa mai atunuu o le lalolagi, e gasolo iai e matamata ai, ma faatau ai ni a latou ata e fai ma mea e faamanatu ai aso na latou iai i lea aai ma lona matagofie.

I luma o se faamalama tioata oloo faalauiloa ai nisi o ata, oloo iai se ata o le faasatauroina o Iesu Keriso. Oloo tautau mai Iesu i le satauro, a oloo matamata iai le motu o tagata, o nisi e fetagisi, o nisi e tauemu, o nisi e sii i luga o latou lima ma alalaga poo a a latou upu oloo fai. Oloo faaali mai ai ma Maria le tina o le Faola, o tagi ma vaavaai atu i lana tama.

Sa tu i luma o le faamalama lea se tamaloa, ma matamata. Ua leva ona ia le toe manatua le satauro ma lona uiga. O aso o tamaitiiti sa a'oa'oina ai o ia e uiga ia Iesu ma lona fanau mai, ma lona faasatauroina.

Na ia vaai ifo i ona tafatafa o tu ai se tamaitiiti palapala ona mata, masaesae ona ofu, o matamata foi ia i le ata o Iesu i le satauro, i Kalevario.

“O Iesu lena, toeaina! O Iesu lena, i luga i le satauro! Na latou tu'itu'i o ia i le satauro, ma 'o'omi ifo le pale tuitui i lona ulu. Ioe, o Iesu lena oloo

tautau mai i le satauro! Na latou fasioti ma velo lona itu i le tao! A o Iesu o le tagata lelei, na oti mo tatou! Ma lona tina lea i le itu lea o le ata. Lea ua matua tagi lava ona o lana tama la e tautau i le satauro.”

Ua toe pupuna a'e i luga i lagona o le tamaloa mea sa a'oa'oina ai o ia a o tamaitiiti, ona o faamatalaga nei a le tamaitiiti e palapala mata, masaesae ofu, leai ni ona seevae.

“Toeaina, na oti mo oe, ioe! Na oti foi mo a'u. Na oti o ia mo tatou! Na oti mo a tatou agasala ma tanu i le pito lale i luga o le ata.”

Ua vevesi lava le mafaufau o le tamaloa ona o tala a le tamaitiiti. Ua liliu ma savali ese atu mai le faamalama tioata. Ae faalogo atu, ua toso e le

tamaitiiti le pito o lona 'ofu. Na liliu, ma faafesaga'i ma le tamaitiiti mata palapala lea ua tu mai i ona luma ma pulato'a a'e ia te ia ma fai atu, “Toeaina, ua galo ia a'u. Ua galo ia a'u ona ou ta'u atu, na toe tu mai le Alii. Na toe tu mai ina ua te'a aso e tolu! Mai le tuugamau na toe tu mai ai o ia i le aso lona tolu!” Ua tamo'emo'e le tamaitiiti ma alu, ua liliu foi le toeaina ma alu ia. Ae faalogo atu ua toe tauvala'au mai le tamaitiiti, “Toeaina! Toeaina!” Ua tu atu iai le toeaina a ua selasela mai le tamaitiiti ma fai atu, “E te iloa le mea malie, na o le toe ola mai lava, aua sa oti. Oti moni lava! Na ona toe ola mai lava i le fanua oti na tanu ai, alu fai lana tunui'a i le matafaga. Pei e le mamafa ia ia le oti lea faato'a sau ai. E le ano iai. Pei se mea fua ia ia! Ia, tofa toeaina!” Na o le tu o le tamaloa ma vaavaai i le tamaitiiti lea ua u mai lona tua. Ma mafaufau, poo ai lea tamaitiiti, lea ua ia faamatala mai ia ia mea sa faalogo iai a o tamaitiiti foi ia, a ua ia le toe manatua.

“Ua fetalai mai le Alii ia Aperamo” - Ken. 12:1

Na mafai e Aperamo ona ia lagona le fetalai atu o le Atua ia te ia e faapea: “Ia tuua e oe o lou nuu, ma tagata o lou nuu, ma le aiga o lou tama, ae alu atu i se nuu ou te faasino atu ai ia te oe - Ken.12:1. E le'i iai se Tusi Paia e mafai ona su'esu'e iai Aperamo pe o le finagalo moni lea o le Atua. E le'i iai foi ni perofeta i ia ona po e mafai ona

fai atu ia Aperamo, “Ua faapea ona fetalai mai o le Alii...” O le lelei o le faalogo i le mea tonu ua fetalai mai ai le Alii. O lea la ua valaau mai le Alii ia te ia e tuua lana galuega, lona aiga ma lona siosiomaga saogalemu. Sa mana'omia tele ai e Aperamo se faamaoniga o le siufofoga moni lea o le Atua. Ma o lenei
faaauau itulau e sosoo ai

O le Lima Foa'i ma Fesoasoani

tupe laitiiti foi lea oloo iai i la'u 'ato, e le lava ai le tau o pepa. E \$20 le tau o pepa mo lo matou aiga e to'a lima. Fai mai foi le teine tali pepa, e laitiiti lava pepa la e totoe. Ae ona pau foi lea o le Faaaliga e avanoa uma iai lo matou aiga. Na ou lilu ma le faanoanoa o le a ou toe fo'i i lo matou fale e aunoa ma ni pepa ulufale i le Faaaliga. A o le taimi lea na fai mai ai se teine ia au, "Tuu mai ou te faatau ni pepa ma lou aiga." Ona tago lea ua tuu mai le tau atoa o a matou pepa, e \$20. Na ou fai atu iai ou te toe totogia lana tupe, ae fai mai, "Leai! Ou te fia faatauina a outou pepa

ulufale. O la'u fesoasoani lea mo outou. Faamolemole, talia la'u tupe. E mafai ona e toe totogiina mai i se aso pe a e mana'o pea iai."

Ona ou faatauina ai lea a matou pepa ulufale. Na ou tusia i lalo le igoa o le teine ma lona tuatusi faataua ou te auina iai se siaki e totogi ai lana tupe. O le aso na sosoo ai na ou auina ai se siaki e \$20 i le teine. Ae ou te'i i le isi aso ua ou maua mai i le teine se tusi o faamatala mai ai lona tagata, ma lana masani o le fesoasoani i isi tagata. Fai mai a ia, o lana misiona lea, o le fesoasoani i e o mana'omia se fesoasoani.

O le taeao o le aso o le Faaaliga na ou tatalo ai i le Atua ina ia solosolo manuia le aso, ma taunuu le faatauina o pepa ulufale mo lo matou aiga.

Sa ou tu i le laina umi ma faatalitali mo le tasi ma le afa itula mo le faatauina o ni a matou pepa, a oloo pito mai ia au le teine ou te le'i talanoa iai, ou te le'i manatu foi o le a oo ina fesoasoani mai ia au. A o le teine lea, o le tali lea o la'u tatalo na fai i le Atua i le taeao lea. O ia lea na faatinoina le tali mai o le Atua i la'u tatalo.

E tele taimi tatou te miomio ai ma le toatele o tagata, e aunoa lava ma so tatou manatu, o nisi o ia tagata, e latou te faatinoina le tali mai o le Atua, ia tatou talosaga o momoli atu ia te ia. E oo foi ia te oe, e ono auala mai ia te oe le fesoasoani o le Atua e tali atu ai i tatalo a isi tagata, e aunoa ma sou mate'ia.

tusia e Linda Claire Scott
faamatalaina e
Afemata T. Apelu Aiavao

“Ua fetalai mai le Alii ia Aperamo”

tala e silafia ai sa matua felata'i le mafutaga a le Atua ma Aperamo. O se mafutaga foi e umi se taimi o atia'e, ma faatuputupuina atili, ma faamaonia lona lelei. E mafai ona fesoasoani atu isi tagata e ta'u atu le finagalo o le Atua, peitai, o le mea moni lava, o oe lava e tatau ona e faalogologo lelei i le musumusuu atu o le Atua i lou tagata. E leai se mea e sili ona faatuputeleina ai lou loto tele pe a e lagona lelei le

musumusuga a le Alii ia te oe. Fai mai le tusitala o Gary Thomas, na tatalo ma lona to'alua i le Atua e faasino mai pe tatau ona la faatau se fale ua la matamata ai ma mananao iai. Ona la amata ai lea ona tuu atu ia la talosaga i luma o le Atua lo la mana'o, i lea aso ma lea aso ma lea aso. Ona la faatau ai lea le fale. Lima tausaga ua te'a ae pa'u i lalo tau o fale i le vaega o le aai. Ma ua gau ai le ulugalii ia la tupe e tele na alu i

le faatauina o le fale. Ona faitio ai lea i le Atua, "Aisea na e le taofia ai ma'ua e 'aua le faatau le fale?" Ae musumusuu mai le Atua, "Lua te le'i mate'ia na ou mana'o lua te nonofo i le mea lea, ma lua galulue ai mo a'u? Lua te manatu i tupe, ae lua te le manatu i sa lua galuega e mafai ona fai ai i lea nuu e fesoasoani ai i tagata matitiva?"

E le'i fetalai atu le Atua ia Aperamo, "Nofo iinei, ona ou faatamao'aigaina lea o oe." Leai. O le fetaliga: "Ia tuua e oe lou nuu." E le sili atu le mea tatou te manana'o iai i lo le mea e finagalo iai le Atua. E ui lava ina manaia se fale, se fanua, se

faaauau itulau e 14

Sa matua alofagia lava
e tagata e toatele le tama'ita'i
tauaso tuisolo o Fanny J.
Crosby. O le vai taimi o le va o
le 40 ma le 50 o ona tausaga na
faato'a ia amata ai ona tusi upu
o ni pese. Ae mai lena taimi na
o le tafe mai faavaitafe upu
faalototele faalu'itau mo
Kerisiano, ma avea ai o ia o se
"tagata aupito fiafia i le
atunuu." Ua fai ma masani a
tagata le afe i lona fale e
talosaga na te tusia ni upu mo
ni a latou faatasiga faapitoa.

O se isi aso na asiasi atu ai ia
Fanny le alii o Viliamu
Kekipati, (William
Kirkpatrick), o se tagata e
talenia i pese faaevagelia, i le
taimi lea faato'a uma ona ia faia
nota mo se pese, ae le'i iai ni
ona upu. Na nofo Viliamu i le
piano ma tata le fati, ae vaai atu
i le fiafia o foliga o Fanny a o
faalogologo. O le taimi foi lea
na tootuli ifo ai Fanny, e pei o
lana masani, ma tatalo, a o taina
lava le fati na faia e Viliamu. Na
amata ai foi i le taimi lava lea
ona faasolo mai i lona mafaufau
upu e fetau lelei lava ma le fati
o taina e Viliamu.

O upu o lena pese ua faaalua
ai le manumalo na foaiina atu e
le Atua mo Fanny, i tausaga e
tele o lona ola tauaso, ma lona
lalolagi pogisa. E sili atu i 8,000
fuaiupu o pese na tusia e lena
tamaitai faatuatua. Na faaali
lona naunauta'iga e faapea, o
lona mana'o, ia mafai ona ia
ta'ita'i ia Keriso soo se tagata
lava e feiloa'i atu iai, ma
faaolaina. Na o le Atua la o loo
ia silafia, pe fia ni selau poo ni
afe o tagata na ta'ita'iina e lena
tina i le Atua, ona o upu ma fati
malie faamomoloto o pese na
ia tusia i lona olaga tauaso.

O le Mafuaaga o le Pese He Hideth My Soul in the Cleft of the Rock

A wonderful Saviour is Jesus my Lord, a wonderful
Saviour to me; He hideth my soul in the cleft of the
rock, where rivers of pleasure I see.

A wonderful Saviour is Jesus my Lord, He taketh my
burden away; He holdeth me up and I shall not be
moved, He giveth me strength as my day.

With numberless blessings each moment He crowns,
and filled with His fullness divine, I sing in my rapture,
"O glory to God for such a Redeemer as mine!"

When clothed in His brightness, transported I rise to
meet Him in clouds of the sky, His perfect salvation
His wonderful love, I'll shout with the millions on high.

Chorus: He hideth my soul in the cleft of the rock that
shadows a dry, thirsty land; He hideth my life in the
depths of His love, and covers me there with His hand,
and covers me there with His hand.

"Ua fetalai mai le Alii ia Aperamo"

mai le itulau e 13
pisinisi, poo le a lava se mea o
tatou manana'o iai, a o le ala
lava e tataua ona tatou uia, o le
fesili muamua lea i le Atua, pe
tatau, ma tusa ma lona finagalo,

le mea o le a tatou fai, le mea o
tatou manana'o iai.

O le faalagolago moni lena
ma faatuatua i le Atua, o le mea
na te faia mo oe, o le mea lena e
sili.

Mai le Lomifefiloi a Pratt

from Pratt's dictionary
talū, since - Talu ananafi ua
ūa. It has rained since yester-

day.
manū, while - Ia outou saili ia
Ieova manu o mafai ona maua
o ia."
i ē luā, the day after tomor-
row. (Tala atu taeao)

FAILAUGA I LE SULU SAMOA 2015

	<u>SUAFA</u>	<u>AULOTU</u>	<u>MATAGALUEGA</u>	<u>MASINA</u>
1	Simona Perefoti FS	Etena Fou	Aana	Ianuari
2	Timoteo Momoemausu FT	Mutiatele	Lepa, Lotofaga	Fepuari
3	Kelekolio Sanele FS	Salani	Falealili i Sisifo	Mati
4	Simalu Kovati FS	Taga	Faasaleleaga	Aperila
5	Alesana Afamaaga FS	Lefagaoalii	Ituotane	Me
6	Afa Afato FS	Suva	Fiti	Iuni
7	Alapi Eti FS	Tafuna	Amerika Samoa	Iulai
8	Maafala Limā FS	Kolisi Malua	Malua	Aokuso
9	Faito'aga Tolua FS	A'oa'oga Kerisiano	Matagaluega A'oa'oga Kerisiano	Setema
10	Vavatau Taufao FS	Faatonusili	Ofisa A'oga	Oketopa
11	Epati Setefano FS	Faatonusili	Fanua ma Fale	Novema
12	Tanoa Tunupopo	Galuega Faamisionare	Ofisa Failautusi	Tesema

2016

Toe foi atu i Amerika seia o'o mai ia Malua i se lisi fou.

FAILAUGA O LE SULU SAMOA 2016

1. AMERIKA -
2. HAWAII -
3. NIUSAUELESE -
4. VITORIA -
5. KUINISELANI -
6. NIU SILA I SAUTE -
7. MANUKAU -
8. AUKILANI -
9. APIA I SASA'E -
10. APIA -
11. FALEATA -
12. MALUA -

Faamolemole le au fai lauga ina ia vave fa'ao'o mai lau lauga i le Ofisa o le Sulu Samoa pe Emeli mai i le sulusamoa@cccs.org.ws poo le Ofisa o le Failautusi Aoa, a'o toe lua vaiaso o lumanai ai le masina e te lauga ai. Ia manuia le laugaina o le upu. Faafetai, **Ofisa o le Sulu Samoa.**

MATINI LUTERU

1483 - 1546

O le Auupega o le Toe Fuata'i

mai le itulau e 6

faia uma e Katherine. E le gata na ia vaaia le fale e 40 potu moe sa nonofo ai, ae na maua foi e Katherine mai ona matua ina ua maliliu, lo la fale i Salasitofu, e tusa ma le lua aso e malaga ai iai i le isi itu o le atunuu mai Uitenipeka. E iai faato'aga a le aiga o Katherine, o togalaau teuteu, o togalaau 'aina, o le vai e faatataa ai i'a, o povi, puua, lupe, kusi, ma le maile (o le maile lea o le fiafia ia iai o Matini, ma naunau ai ina ia la fetau i le lagi). Ma le 'ava malosi (home brew). Ae 'auna ne'i e te'i ai i le iai o se *home brew* a le aiga o Katherine. Aua sa iai talitonuga i ia aso, o le 'ava malosi e fafagaina ai le tino. O le ava malosi la i tagata o ia vai taimi, o se vaiinu e pei o vaiinu polotini i nei ona po. E eseese ai lava le uiga o tagata o Siamani i le 'ava malosi, i lo talitonuga o tagata o Amerika. O tagata Siamani, e fuafua le latou inu, e le soona inu. O le 'ava malosi foi sa aoga ia Matini Luteru, ona o le ma'i soo.

Sa sili ona fiafia Katherine i le fanua o lona aiga i Salesitofu i lo le fanua o Matini i Uitenipeka, ae ona o le ma'i soo o Matini, o lea sa ia misia ai Katherine pe a alu i Salesitofu. Na tau faatau foi e Katherine le isi fanua e faaopoopo i lona fanua o iai, e pei ona masani ai aiga tamalii o Siamani, ae faatautau Matini i le mea o fia fai e lona to'alua. Ma oo ina

fai atu ia Katherine, "Keiti, o lea e iai lou toalua e matua alofa lava ia oe, aisea e te fia avea ai ma masiofo.?"

I le sa taumafai lava Katherine e faafiafia ia Matini, ma nofonofo ai lava e tausi i taimi o ona ma'i. Ma ua pei ai lava o se foma'i i lona iloa o lea vai ma lea vai. O ma'i sa maua ai Matini o le gugu, le lelei se moe, ma'i manava, maa i fatuga'o, ma isi. Ua matua lelei Katherine i fofo o ma'i o lona to'alua. Sa fesoasoani tele foi le 'ava malosi mai le aiga o Katherine i le togafitiga o maa i fatuga'o o Matini ma le faigata ona maua o sa na moe.

I se tusi na ia tusia mo Katherine na ia faapea ai, "I le tamaitai uiga agelu ma le popole vale o Keiti Luteru, o le foma'i i Salesitofu ma Uitenipeka, si o'u toalua agaalofo. Matou te faafetai atu ia te oe ona o lou popole vale e tau le maua ai sau moe. A le tuua lou popole vale, ou te talitonu o le a foloina tatou e le elelee. Tatalo ma tuu le popole i le Atua. Lafo au avega i luga o le Alii."

Ua tuputupua'e pea le alofa o Matini i lona to'alua o Keiti i ia tausaga o le la mafutaga faaulugalii faaipoipo. A o le'i faaipoipo o ia, sa ia faaali ai e faapea, o le faaipoipo o se mea e tatau ai mo le itu faaletino. Ae mulimuli ane ona ia faaalua lea e faapea, o le faaipoipo o se mea e aoga mo le itu faaleagaga.

Fai mai a ia e uiga i le

faaipoipoga, "O le ulua'i alofa e pei o se ona" A te'a le 'ona o le alofa, ona faato'a oo ai lea i le alofa moni i totonu o le faaipoipoga. Ma o le mea lea sa pupula i lo la olaga faaipoipo ma Keiti.

O le malosi o lona alofa ia Keiti na oo ina ia faaigoa ai lana tusi e uiga ia Paulo, "O la'u Katarina Voni Pola" (My Katharina Von Bola). Na ia faaalua foi se manatu e uiga ia Katherine e faapea, "I galuega tau i le aiga, ou te lafoa'i mea uma ia Katherine. A le o lea, e ta'ita'iina a'u e le Agaga Pa'ia."

E tele ni tautalaga ma ni tusitusiga a Matini e uiga i le faaipoipoga. O nisi nei o ona manatu:

***E moni lava, e tatau ona alofa le Kerisiano i lana ava. Aua foi e tatau ona alofa i lona tuaoi! Ma ona o lona to'alua o lona tuaoi aupito latalata lea ia ia, e tatau ai foi ona matua alofa iai. E tatau ai foi ona avea ma ana uo mamae faapelepeleina.

***E le se mea taufaa'ata le faaipoipoga...e tatau ona galue lelei ai, ma tatalo ai. O le sailiga o le ava e faigofie, ae o le tumau o le alofa i le ava e le faigofie, aua e le lava le faatasiga faaletino, e tatau ona fe'oe'oea'i i mea e fiafia iai ma uiga. Ma o ia uiga e le vave ona tupu a'e.

***O le maua o le filemu ma le manuia ma le alofa i se aiga faaipoipo o se meaalofo e pito atu i le malamalama i le Tala Lelei.

***O nisi faaipoipoga na mafua mai i mana'oga o le tino. A o

faaauau itulau e 17

Ia e A'oa'o mai ia te a'u e faia lou finagalo

mai le itulau muamua
falei'a i lea motu tele, e pei ona fautuaina ane e se tasi o ana uo.. O le faalavelave, e iai foi isi mea o tutu mai i ona luma e tatau ona ia faia. Muamua, faato'a uma ana a'oga faafoma'i i le Iunivesite o Oxford, ma e tatau ai ona faigaluega e fesoasoani i lona aiga. O lona lua, faato'a te'a se sauniga faa-eva-gelia a le failauga ta'uta'ua o Dwight L. Moody, lea na tuuina atu ai e Uilifereti lona ola mo Keriso, ina ua uma ona faalogologo o ia i le lauga a le fai-eva-gelia.

Na fiala o ia i le avanoa na tuuina atu e lana uo e malaga ai

i Newfoundland, ae i se isi foi itu, o le a le avanoa ai o ia e faataunuu nisi o ona tiute o se Kerisiano ua ofoina atu lona ola mo lona Alii.

Ae ina ua fesili atu Uilifereti i lona tina pe o le a le mea e tatau ona fai, na ia tali ane i lana tama e faapea: "Alu e faaoga i lou ola i aso uma upu o le Salamo 143:10: "Ia e a'oa'o mai ia te a'u e fai lou finagalo; aua o oe lava lo'u Atua; ia ta'ita'iina atu a'u e lou Agaga lelei i le laueleele laulelei."

Na oo ina malaga Uilifereti i Newfoundland, peitai e le mo se tafaoga asiiasi i falei'a. E 42

tausaga o galue ai Uilifereti i Newfoundland ma Labrador o se misionare foma'i, ma na faatuina i le tele o ia aai ni falema'i ma ni a'oga mo tausima'i, sa faaaogaina ai ni vaaafi ma ni taavale see i le kiona e tosoina e ta'ifau.

O se a'oa'oga tele lea mo tatou, poo le a lava le mea e te filifili e faia i lou olaga, fesili i le Alii e fesoasoani mai ia te oe ina ia e faia lona finagalo, ae le o lou loto. E manuia ai mea e te fai.

E manino foi i lenei tala, o le tina o Uilifereti o se tama'ita'i e faitau Tusi Paia, fua ina ia manatua ia upu mai le Salamo: "Ia e a'oa'o mai ia te a'u e fai lou finagalo; aua o oe lava lo'u Atua, ia ta'ita'iina atu a'u e lou Agaga lelei i le laueleele laulelei."

MATINI LUTERU

mana'oga ia e iai foi i iniseti ma utufiti. E amata le alofa pe a tatou sauni e auauna i isi tagata. ***Ou te le mana'o e aveese le popole ma le ita mai le aiga faaipoipo. E aoga foi le faateleina, aua e faai lava i se mea e matua fiala ai, e pei ona silafia e i latou ua oo iai.

***E leai se mea e sili atu ona suamalie i lo le filemu e maua e se aiga faaipoipo, ae leai foi se mea e sili ona faanoanoa ai pe a feeseesea'i se aiga. E pito atu i lea le oti o se isi o le fanau. Ou te matua iloa lelei le tiga.

O le Alofa i Tamaiti ma le Oti o Tamaiti

E malamalama lelei le 'Au Matini i le uiga o lagona e oo mai pe a oti se isi o le fanau. E

to'aono le la fanau, na oti le to'alua. E le taumate o le maliliu ai o tamaiti ia o se mea aupito tiga lea ua oo ia Matini i lona olaga atoa. Pei ua atoa lona olaga ina ua iai a la tamaiti ma ia maua mai ai ia i latou le fiala. O le mea lea na matua mafatia ai o ia ina ua maliliu tamaiti, ma vevesi ai lona mafaufau. Na ia masalosalo lava e le toe fo'i o ia i se lelei ina ua maliliu tamaiti. Sa matua fiala ma tausua ai ina ua avea o ia ma tama, pei lava ona fiala o ia ina ua avea ma to'alua o Katherine. E iai se taimi na ia faaalua ai e faapea, "E tele mea e a'oa'oina ai le tama pe a alu e tautau napekini ae vaavaai mai iai ona tuaoi ma talie. Ia, talie pea outou. Ou te le popole iai, o le la e fiala mai ma soiso'i foi le

Atua ma le 'au agelu i le lagi i la'u tautauga napekini!"

O le manatu o Luteru, o lona tulaga o ia o se tama o tamaiti, o se mea e matua anoanoa'i lona uiga ma ona tiute. Fai mai a ia e leai se malos'i e sili atu i lo lea na tuuina mai e le Atua i matua o tamaiti.

mai le tusi: God's Generals, tusia e Roberts Liardon, faamatalaina e Afemata T. Apelu Aiavao

O le a le uiga o le upu: FOFOGA?

gutu - (mouth); mata - (face, eyes); taliga - (ears); isu - (nose); laulaufaiva - (tongue).

O E UA MALILIU

Suluama Ualesi

Israelu

2 Mati 1927-12 Oketopa 2014

Na soifua mai le tinā i le aso 2 Mati 1927 ae na valaau le matai ia te ia i le aso 12 Oketopa 2014. Ua 87 tausaga ma masina ma aso lona matua. O ona matua o Tagiilima Faileva ma Senerita Maile. Sa faaipoipo atu ia Ualesi Isaraelu o le A'oa'o Malua. O le aofai o le fanau e 12 a o fanau a fanau e 60, e fa le aofai o ana augatupulaga. Ina ua fa'ai'uina mai le taumafai ona fai ai lea ma faifeau i Faleu Manono mo nai tausaga. Ona avea ai lea ma faifeau i Lona Fagaloa mo tausaga e 23. Ona toe avea ai lea ma faifeau i Suga i Letogo ma maliu ai le Faifeau. Na foi mai Sulu ma nonofo ma le fanau i Vaivase Uta. O le tausaga e 1984 na aulotu ai i le Ekalesia i Tanoalei'a. A o le tausaga e 1985 na fa'ae'etia ai

le tofi tiakono ia Sulu. Sa fai ma failautusi o le atinae o le falesa, faapea foi ona fai ma failautusi o le faigataulaga. E ese foi Sulu mai isi tinā sa galulue i le galuega. E le i mana'o e nofonofo, a ua ia mana'o e fa'aauau pea ona galue e ala lea i le fai o lona tofi tiakono. E fa'amalosiau mo isi tagata e ala i lana galuega ma faatino. O le mafutaga a Tinā Tanoaleia sa galulue malosi, ua afua ai ona tu le falesa. O se tinā malosi le tino, lona mafaufau ma le agaga, malosi le leo, malosi le galue. E to'afa faifeau e tupuga mai i le tinā ia Sulu, e toalua o lo o faifeau i EFKS a o le isi to'alua o lo o faifeau i isi lotu. Na fai foi nisi ma tiakono toeaina, a o nisi o lo o fai ma A'oa'o Fesoasoani. O lona sauniga faale-aiga sa faia i le afiafi o le aso 19 o Oketopa 2014. O a'u na ta'ita'i, sa molimau le fanau faatasi ma nisi o uo ma e masani, i le soifua o

lana auaua. O le aso 20 na faia ai lona toe sauniga i le 11 i le taeao. Sa valaaulia le Pulega a Vaimauga Sisifo. O le toeaina o Peteru Tone FT sa ta'ita'i. O Iupeli Ieremia FS na ia momoli maia le tino maliu o le tinā, o Setu Samitioata FS na faitauina le Tusi Paia. O Fa'alenuu Tagataese FS sa tatalo, a o Fuamai Samuelu FS na saunia le upu faamafanafana. O Uaea Isaraelu FS sa faia le molimau a sui o le fanau, a o au na faia le molimau faale agaga o le tinā. Esoto 1 : 19 "Auā e le pei o fafine o Aikupito fafine Eperu, auā e malolosi lava i latou, ua uma ona latou fanau mai a o lei oo atu lava le faatosaga i fanauga." Ona faaii ai lea i lona oliolisaga tumau, ma faamavae atu ai i le pese a le auuso. Talofa uso e, tōfāina oe..... Tōfā Sulu manuia lau malaga.

Saunia: Enefatu Lesa (FS)

EFKS Tanoaleia, Vaivase-uta

Tagaloa Sauoaiga

Tafaiioletagaloa Elisara

Tuifaiga Gale

17 Oketopa 1946-9 Aokuso 2014

Na soifua mai Tagaloa Elisara Gale i lona aiga i Vaisala i Savaii i le aso 17 Oketopa 1946. Ae na faamavanaina ana feau e lona matai i le aso 9 Aokuso 2014. Ua 68 tausaga ma masina ma aso, lona matua. O ona matua o Tuifaiga Samia Mealeaga Gale ma Mulu Lepu'a Gale. E toalima uso ma

tuafafine e 3. Sa faaipoipo ia Siavata Nofoaiga Noa i le aso 21 Oketopa 1972. E toa tolu le fanau, ma le fanau a fanau e toa iva. Sa fa'ae'eina lo la tofi tiakono i le tausaga 1975. O lona uiga ua 39 tausaga o fai ma tiakono. O se isi o Sikolasipi a le malo, na foi mai ma faiaoga i le A'oga Matata Eseeese i Vaivase, ona soso'o ai lea ma isi galuega sa valaauina ai. Na malolo ritaea, a o avea ma sui pule o le fale sikaleti i Vaitele. Sa fai ma failautusi o le Ekalesia mo tausaga e tele, sa fai ma

ta'ita'i pese mo tausaga e tele, sa fai ma peresetene o le autalavou mo tausaga e tele. Sa fai ma usufono i le Fono Tele i le 1998. O se tiakono faamaoni i ona tiute fai, tausi le taimi ma fai ma faata'ita'iga mo isi. Loto maulalo ma agamalu, e le si'i so'o, ae fa'amoemoe ia te ia le tele o mea, mo le fa'aleleia ma le fa'amamaluina. Sa taulamua i le faiga o le malae ta'alo o lo o i ai nei mo le nu'u i Vaivase Uta. Ma galue e tu'ufaatasi tupulaga a Vaivase Uta, ina ia maua pea

faaauau itulau e sosoo ai

O E UA MALILIU

**Tagaloa Sauoiga
Tafaiotagaloa Elisara
Tuifaiga Gale
17 Oketopa 1946-9 Aokuso 2014**

le fealofani, ma le faatauaina o le atina'eina o mea tau taaloga e ono fai ma manuia o nisi o tupulaga. O lona sauniga faale aiga na faia i le fale maliu o Ligaliga i Leififi i le aso 14 o Aokuso i le afiafi. O le Susuga i le toeaina Fa'au'uga Matautia FT na ta'ita'i i le sauniga. O Epati Setefano FS na tatalo, a o

Reupena Nofoaiga. FS na lauga. Sa toatele uo ma aumea mamae, ma aiga sa molimau i le soifua o le auaua ma mafutaga. O ona toe sauniga sa faia lea i le aso 15 Aokuso, i le itula e 10 i le taeao. O a'u na ta'ita'i, o Julius Fruean AM na ia aumaia le tino maliu o le tamā, o Masoe Iosefa AF sa faitauina le Tusi Paia, o Galuvao Uili AF sa tatalo, a o Asi Tuioalega FM, sa saunia le upu faamafanafana. Na molimau Siavata i le mafutaga ma le tamā, o Kirk Faatupuloto na fai ma sui o le fanau e molimau i lo latou tamā. O lona

molimau faale agaga na ou saunia. II Tupu 2 : 10 Ona fai atu ai lea o ia, o le mea faigata ua e fai mai ai, ae afai e te iloa mai ai pe a aveeseina a'u ia te oe, ona faapea lea ona fai, a e afai e leai, ona le faapea lea. Ona fa'ai'u lea i lona oliolisaga tumau, i lona aiga i Tanoalei'a Vaivase Uta, ma faamavae atu ai i le pese a le au uso Talofa Uso e, tōfāina oe, Tōfā Tagaloa manuia lau malaga.

Saunia: Enefatu Lesa (FS)

EFKS Tanoaleia, Vaivase-uta

O le Tina na Vaetamaina A'u

O o'u mata fai mai tagata e 'e'ena, ma lo'u laulu lanu auro, o le vaega lea e aupito sili ona manaia o lo'u tino. E fai si lapo'a tele o lo'u isu. E le lapo'a lo'u tino, ae le pa'e'e fo'i. Ou te malie lava a'u i o'u fuaitino ma o'u foliga, peita'i, o fea na ou maua mai ai? Mata ma te foliga faatasi ma se tagata ou te matua leiloaina?

O le tele lava o taimi, a ou savali i le alatele, ma matou fetau ma ni fafine, ou te fesili ifo i lo'u mafaufau, pe le o se tasi o ia fafine na fanaua a'u.

Ou te le'i fetau lava i le fafine na fanaua a'u. Na vaetamaina a'u ina ua ou fanau mai, ma ave a'u e se aiga matua lelei lava, ma fai a'u ma a latou tama. Ae iai lava taimi ou te mafaufau ai, pe o le a se ituaiga olaga ou te iai pe afai o ma faatasi pea ma lo'u tina moni. Mata e ese ni

o'u uiga pe ana faapea o ma faatasi pea ma le fafine na tau'aveina a'u i lona manava i masina e iva? Mata o la'u amio lava lea e iai pe ana faapea o ma faatasi? O fea ou te nofo ai? O ai ni a'u uo?

Ou te le'i malie lava i lo'u olaga o iai. E le'i uma fo'i lo'u tau fesilisili pe faapefea se olaga ou te iai pe ana faapea o ma faatasi pea ma le tina na fanaua au.


Ona oo loa lea i le isi aso, a o ou vaia se tama a sa'u uo, na ou tau atu ai i se solo na tusia e se isi, o faapiii i le moega o le pepe. Oloo faamatalaina e le solo se fatu na toto e se isi ma ola, ona tausia lea e se isi tagata, ligi iai le vai e faasusu ai. Se'ia oo ina tupu tele mai ma matua manaia lava. Na ou mafaufau, e faapea moni lava a'u. O si o'u tina o iai nei lea na ia

vaetamaina au, na ia tausii mai ma talanoa mai ia a'u ma faatonutonu a'u, seia oo ina iai se tagata e faapea ona uiga, ma ona foliga, ma le amio, o a'u. E tele lava ina tutusa mea ma te manana'o iai pe a ma faatau, ma o ma uiga i tagata e matou te feiloa'i. E iai lava i soo se mea ou te iai, i a'u taaloga, i le taimi e fai ai so'u tui puipui e le foma'i ae na te uuina lo'u lima ma faaoleole a'u. O ia lava o si o'u tina. Fai mai lava tagata matou te fetau e tutusa lelei lava o ma foliga, ona ma talie ai lea ma ou manatua ai i lea taimi, e ese le fafine na ia tau'aveina au i lona manava mo masina e iva.

Peitai, o lo'u tina o iai nei, e matua lelei lava ma sili atu i lo'u manatu. O ia na faia mai a'u i lo'u laitiiti seia oo mai ina ou matua. O ia na fa'a'auleleina lo'u tagata - o'u uiga, o'u foliga, ma la'u amio. O ia foi na ou ola ai.

tusia e Kristy White.

ATA O E UA MALILIU



**Suluama Ualesi
Israelu**



**Tagaloa Sauoiga
Tafaiotagaloa Elisara
Tuifaiga Gale**



Masame Iosefatu

Masame Iosefatu

Maliu 12 Iulai 2014

O le Tofa ia Masame Iose na faae'etia lo la tofi Tiakono i le aso 30 Mati 1992. Ina ua maliu lona taus i le aso 22 Me 2002, sa tauave toatasi mai ai lava e Masame lo la tofi faatasi ma le lagolago a le fanau, seia oo ina tuumalo i le aso 12 Iulai 2014.

Sa tauivi ma finau e ui ina faata'otolia i se gasegase i le 2006. E tele komiti o le aulotu sa galue ai. E lelei tele lona mafaufau i tala o le Tusi Paia ma e sa fiafia e faasoa atu lona malamalama i fanau e ala i le galuega faiaoga Aoga Aso Sa. O se tama e loto maulalo ma agamalu ma galue fiafia.

Na aumaia i tua lona tino maliu mai le fale maliu i Tuasivi i le aso 24 Iulai 2014, ma amata

ai lona uluai sauniga i le malumalu o Mataniu Feagai ma le Ata i le 9 i le taeao. O lona toe sauniga i le 12 i le aoauli sa faia lava i lona aiga, sosoo ai ma lona oliolisaga tumau i lona fanua i luma lava o lona laoa.

'Amuia e ua oti o e ua oti oi le Alii.'

Rev. Esera A. Esera
Faifeau Sapapalii

Miriama ma ona Taimi Mata'ina

O Miriama o se tagata e pei lava ona uiga o tatou. E iai ona taimi mata'ina, ma ona taimi e le lelei ai.

Taimi 1: Ina ua faasaoina e le afafine o Farao le 'ato na opeopea ai Mose le tuagane o Miriama i le vaitafe o le Naila, ona fai atu lea iai o Miriama i le purinise o le a alu e su'e mai se fafine Eperu na te tausia. Ona tamo'e lea i le latou fale ma aumai lona tina. O lona taimi mata'ina lea. (Esoto 2:1-8)

Taimi 2: E foliga mai o le a maua atu e 'autau a Aikupito tagata Isaraelu ma fasiotia i latou. Peitai ua vaeluaina e le Atua le Sami 'Ula'ula ma mafai ai e tagata Isaraelu ona sosola mai le oti mautinoa, ae malelemo ai 'autau a Aikupito ina ua toe fesoota'i le vaitafe. Ona ta'ita'iina ai lea e Miriama fafine uma o le nuu i viiga o le Alii. Ua ta'u e le Tusi Paia o ia o le perofeta ona o lona tautala i le mea moni e uiga i le Atua.

(Esoto 15:19-21). O le isi taimi mata'ina lena.

Taimi 3: Ua faitioina e Miriama ma Arona ia Mose ona ua faiava i le fafine Kuso. Na mafua ona o le la fua i le ta'ita'iga e lo la uso ma le tuagane, o Mose, o le nuu. Na to'asa le Atua ia i la'ua ma faaoo ai le ma'i lepela ia Miriama. (Numeru 12:1-12. O le taimi le lelei lea.

E tatau ona tatou tatalo i le Atua na te ta'ita'iina i tatou i taimi uma, ina ia lelei ma mata'ina mea tatou te fai, e viia ai le Alii, ae le o mea e ono oo mai ai le to'asa o le Atua.